

PENDAHULUAN

Latarbelakang kajian

Undang-undang kontrak , sebagaimana yang telah diketahui umum , merupakan satu sistem undang-undang yang bertujuan untuk mengatur perhubungan dan mu'amalah sesama manusia dalam bentuk yang kemas dan penuh keadilan bagi memenuhi keperluan-keperluan mereka. Keperluan dan kebutuhan manusia kepada sistem undang-undang kontrak yang yang kemas dan rapi adalah amat nyata.

Di dalam membicarakan persoalan undang-undang kontrak , antara perkara yang menjadi topik perbahasan dan perbincangan adalah mengenai persoalan "penawaran dan penerimaan" di dalam pembentukan kontrak. Ahli-ahli perundangan Islam dan Moden telah mengemukakan berbagai-bagai teori dan konsep berkaitan dengan persoalan penawaran dan penerimaan ini.

Memandangkan persoalan penawaran dan penerimaan ini telah mendapat perhatian yang besar di kalangan ahli-ahli perundangan Islam dan Moden di mana persoalan ini telah dibincang dan dibahaskan secara khusus di dalam penulisan-penulisan mereka , maka adalah wajar satu

penganalisaan dibuat ke atas teori dan konsep yang telah dikemukakan oleh mereka.

Lebih-lebih lagi negara Malaysia yang didiami oleh ramai kaum muslimin ini adalah secara langsung , terikat dengan sistem undang-undang kontrak yang dikuatkuasakan di negara ini. Maka adalah menjadi satu kewajipan dan tanggungjawab ke atas umat Islam untuk melakukan suatu kajian dan analisa ke atas undang-undang kontrak yang sedang dilaksanakan ini dengan harapan semoga sesuatu yang terseleweng dan terkeluar dari prinsip-prinsip perundangan Islam yang sebenarnya dapat diperbetulkan demi kesejahteraan ummah.

Bidang kajian

Kajian yang sedang dijalankan oleh diri penulis ini adalah berkaitan dengan persoalan "penawaran dan penerimaan" di dalam pembentukan kontrak. Ianya merupakan satu kajian perbandingan di antara undang-undang Islam dan undang-undang kontrak Malaysia. Undang-undang kontrak Malaysia adalah dirujuk kepada Akta Kontrak Malaysia 1950 (semakan 1974). Rujukan juga akan dibuat kepada "common law" Inggeris di dalam perkara-perkara yang tidak disentuh oleh Akta kontrak Malaysia.

Tujuan Kajian.

Undang-undang kontrak Islam adalah satu sistem perundangan yang bertujuan untuk mendatangkan keharmonian dan keadilan kepada masyarakat. Antara tujuan yang terpenting dari kajian ini adalah untuk melihat dan menganalisa sejauh manakah konsep dan teori yang terpakai di bawah undang-undang kontrak Malaysia bersesuaian dan menepati prinsip undang-undang kontrak Islam yang unggul itu.

Pada masa yang sama, adalah menjadi harapan besar diri penulis semoga kajian yang tidak seberapa ini akan dapat meningkatkan lagi kefahaman kita sekalian terhadap undang-undang Islam yang maha suci ini dan semoga ianya akan dapat menyumbangkan idea-idea yang baru dan bernas ke arah "mengIslamisasikan" lagi sistem undang-undang kontrak Malaysia.

Metodologi kajian

Di dalam kajian ilmiah ini, dua metod penting telah digunakan oleh diri penulis. Metod yang pertama yang digunakan oleh diri penulis adalah metod Penyelidikan Perpustakaan (Library Research). Memandangkan kajian

yang bersifat perbandingan ini memerlukan rujukan dan pembacaan yang meluas, maka metod Penyelidikan Perpustakaan ini adalah teramat penting dalam usaha mengumpulkan data-data yang diperlukan bagi kajian.

Metod kedua yang digunakan bagi kajian ini ialah secara Temubual. Metod Temubual yang dilakukan oleh diri penulis adalah dengan beberapa pensyarah fakulti undang-undang Universiti Islam Antarabangsa. Tujuan yang terpenting dari metod Temubual ini adalah untuk mendapatkan gambaran yang lebih jelas dan tepat mengenai pemakaian dan pelaksanaan undang-undang kontrak di Malaysia.

Masalah kajian.

Dalam usaha menyiapkan kajian ilmiah ini, penulis telah menghadapi beberapa masalah antaranya :

a) Masalah untuk mendapatkan beberapa buku teks Arab yang penulis merasakan amat perlu bagi kajian ini. Tetapi malangnya buku-buku tersebut telah tidak ditemui meskipun penulis telah mencuba untuk mendapatkannya di beberapa perpustakaan utama.

b) Masalah untuk mendapatkan gambaran yang tepat dan menyeluruh mengenai undang-undang kontrak Malaysia dan "common law" Inggeris. Meskipun metod Temubual telah banyak membantu penulis, namun pembacaan yang meluas terhadap buku-buku yang ditulis di dalam bahasa Inggeris amat diperlukan. Ketika berhadapan dengan buku-buku yang berbahasa Inggeris ini, kadang-kala masalah kefahaman yang tepat amat dirasakan oleh penulis;

c) Seperkara lagi yang juga menjadi masalah semasa kajian ini dilakukan ialah untuk mencari masa yang sesuai untuk berhubung dan bertemubual dengan pensyarah-pensyarah fakulti undang-undang UIA. Jadual mereka yang sentiasa padat itu kadang-kala telah menyebabkan sesuatu pertemuan itu terpaksa ditangguhkan.

Demikianlah beberapa masalah yang dihadapi oleh penulis di sepanjang penyediaan kertas projek ini. Walaubagaimana pun bagi diri penulis, masalah-masalah yang dinyatakan ini bukanlah sesuatu yang agak serius. Ianya hanyalah sekadar cabaran yang harus dilalui oleh setiap pelajar.